



### Survegñi in nov museum

Per il 10avel anniversari dal Center da capricorns a Vargistagn hai dà in nov museum.

9



### 100 onns Parc Naziunal Svizzer

La Terra Grischuna ha deditgà in'ediziun entira a l'anniversari dal Parc Naziunal Svizzer.

18

## DIE SÜDOSTSCHWEIZ

# LA QUOTIDIANA

Redacziun: Via comerciala 22, 7007 Cuiria, tel. 081 920 07 10, fax 081 920 07 15

## Onn da grondas midadas tiel Da casa Lumnezia

■ (mc) Igl onn vargau han ils cussadents dil Da casa Lumnezia buca mo transferiu lur dimora da Cumbel el baghetg niev a Vella. Era al tgamun ha ei dau grondas midadas. Adrian Vieli ei daventaus successur da Curdin Casaulta sco meinacasa. Ad el eis ei reussiu enteifer cuort temps da normalisar e calmar la situaziun e cunzun era da terminar il stop da recepir novs cussadents. Suentar in engaschi da biebein in onn ei l'elecziun d'in niev meinacasa puspei actuala. Era el cussegel da fundaziun ha ei dau ina midada

radicala. Ils anteriurs commembers dil cussegel sut l'egida da Silvio Capeder ein vegni relaschai e remplazzai d'in niev gremi sut l'egida da Mathias Bundi. Da quel fan part quater commembers dalla suprastanza communal e dus ulteriurs commembers.

Per l'emprema gada dat la fundaziun era plaid e fatg alla publicitad davart la situaziun finanziaria. Per 2013 siara il quen cun in deficit da 886 451 francs.

> PAGINA 2

## Quatter uniuns èn s'uneidas

■ (anr/gns) An bung en meis seran las portas dalla scola primara e dalla scoletta dallas vischnancas da Riom, Parsonz e Cunter. Li da scola per igls unfants da chels treis lis vaschigns davainta Savognin. Quatter uniuns da chellas treis vischnancas èn s'uneidas ed organiso schi lagn deir uscheia

ena festa da cumgea per scolars e magistraglia. La sala polivalenta a Riom era ple tgi fullanda e vigl e giuven ò galdia l'atmosfera amperneva. Las uniuns scu per exaimpel igl chor viril on er gist procoo pigl program divertent.

> PAGINA 15



Egn digls spierts tar la producziun digls scolars.

FOTO G. N. STIGIER

## Preschantaziun dal roman «Hannes»

■ (anr/fa) Dacurt è cumpari il roman criminal «Hannes» dad Oscar Peer barmier. L'emprima versiun dal raquint «Hannes» aveva scrit l'autur barmier oriund da Lavin gia da l'onn 1971 en lingua tudestga. Suentar ha'l scrit anc pliras versiuns da quel roman. «La versiun rumantscha al plascheva il meglier», di Anita

Capaul, la gestiunaria da la CER. Mesemna saira ha lieu a Cuiria il teater da citad la preschantaziun dal roman «Hannes» I vegn a preleger Arnold Rauch, per l'accompagnament musical vegnan a procurar Risch Biert al clavazin ed Elisabeth Trechslin a la ghitarra.

> PAGINA 13

## Aunc adina negins candidats

Il termin per il secund scrutini dallas elecziuns communalas a Tujetsch vegn spustaus

DA HANS HUONDER / ANR

■ La vischnaunca da Tujetsch sesanfla vinavon alla tscherca da candidatas e candidats per il presidi e la suprastanza communal. Entochen sil termin fixau da nominaziun per il secund scrutini eis ei buca reussiu d'anflar personas che fussen prontas da star a disposiziun. Allas elecziuns communalas la fin d'avrel ha il president communal Pancrazi Berther buca contonschiu igl absolut pli. Per in secund scrutini stat el buc a disposiziun. Ultra da quei ha gerau Baseli Berther buc acceptau l'elecziun. En vesta allas elecziuns haveva la gerava Eveline Soliva-Flepp giu demissionau. Gia dapi varga in onn e miez tscherca la vischnaunca in tschunavel commember dalla suprastanza communal suentar la demission da Marcellino Giger. Entochen la dumengia han ils vischinadis e las gruppaziuns giu la caschun d'inoltrar nominaziuns. Fertion ch'igl ei reussiu d'anflar personas per singuls posts pil cussegel da vischnaunca ni era suppleants stat negin a dis-



Vegn in cumissari incaricau dil cantun a menar Tujetsch interimisticamein naven dil fenadur?

FOTO H. HUONDER

posiziun per ils uffecis da president communal ni gerau. «Sin fundament da quella situaziun savein nus buca far las elecziuns dil secund scrutini ils 15 da zercladur 2014», di Lucas Collen-

berg, menader dil center communal. La perioda d'uffeci va a fin la fin da zercladur, quei che vul dir che la suprastanza communal consisti naven digl emprem da fenadur sulettamein dil

gerau André Schmid. Il cantun vegn ad intervegnir, probabla-mein cun delegar in cumissari el-la vischnaunca da Tujetsch.

> PAGINA 3

## Plaz e peda pil creativ

■ (anr/abc) L'jamna vargada han ils 62 giuvenils dalla scola superiura Lumnezia saviu metter dalla vart ils cudischs da grammatica e matematica. Grazia al project «place4space» dil Post da giuventetgna dil Grischun han els astgau sededicar a caussas creativas. Vendergis han els presentau il resultat. En Surselva eis ei stau la dieschavla acziun. Naven da Sedrun tochen Flem ha il project «place4space»

possibilitau luvratoris ordeifer igl usitau. Semegliant sco ils carschi frequentan cuors e perfecziunaments han els astgau sededicar treis gis ad ina fuorma expressiva. Ord ina purschida da 40 tematicas ei la scola sedecidida per sis, numnadamein acrobatica, filmar, saltar, far teater, realisar in rap e far ina sculputura da lenn. Finamira eis ei stau da promover la creativtad dils giuvenils. Ils buobs e las matta-

tschas dallas annadas 1998 tochen 2000 han saviu s'annunziar per in luvratori en ina da quellas spartas e sededicar duront treis gis cumpleinamein alla caussa. Per els eis ei stau in'experientscha unica. Sco quei ch'il menader da project da «place4space», Stefan Parpan, ha raquintau, ei il project a Vella il davos ch'el realisescha en Surselva.

> PAGINA 5

## Cumbat electoral continua

■ (anr/fa) Als 15 gün elegia il suveran dal circul Suot Tasna la o il successur da Jon Domenic Parolini i'l cussagl grond a Cuoiria. Per intant han annunzchà quatter personas lur candidaturas per quist post. Il prüm da quists candidats es l'indschegner da fabrica Duosch Fadri Felix (pld) da Scuol, prüm suppleant dal circul. Lura ha declerà eir il capo da Ftan, il pedagog social e paur Reto Pedotti (ps) da vulair candidar. Sco terz ha fat palais il fiduziari Andri Lansel (indep.) da Sent sia candidatura. In lündeschdi avantmezdi ha comunicà sco quart l'electroindschegner Urs Domenig (pps) da Sent ch'el haja interess da dvantar il successur da Parolini i'l grond cussagl a Cuoiria.

> PAGINA 11

## Victima da las flommas

■ (anr/bcs) Hoz avant 25 ons es l'Hotel Waldhaus a Vulpera dvantà victima da las flommas. Quella jada l'unic hotel cun tschinch stailas da la regiun. Unic il bügl aint il parc dà amo perdüta d'ün dals plü importants objects da l'istorgia da l'hotellaria grischuna.

> PAGINA 13



La gruppa da sault ha presentau il resultat da treis gis lavur intensiva. Per las mattatschas lumnezianas eis ei stau ina biala experientscha.

FOTO A. BEELI



Servetsch d'abunents e da distribuziun: tel. 0844 226 226 mail: abo@somedia.ch